

Communicaziun a las medias – SRG SSR Svizra Rumantscha (SRG.R)

Emprima seduta 2020 dal Cussegl dal public (Cdp) da la SRG SSR Svizra Rumantscha (SRG.R)

SRG.R: Cuiria, ils 19-02-2020

Olà - da nus para vocês – in'idea che frunta sin grond interess

Dapi l'october 2019 emetta RTR emissiuns rumantsch-portugaisas per far punts tranter la cuminanza rumantscha e la cuminanza portugaisa. Enfin oz ha RTR emess 4 emissiuns da quest format. Il Cussegl dal public (Cdp) da la SRG.R lauda l'idea d'integrar la cuminanza portugaisa e valitescha questas emissiuns sco fitg preziasas.

Per realisar las emissiuns «Olà – da nus para vocês» ha RTR engaschè Lucas Batista, in giuven portugais ch'è creschì si en l'Engiadina. Durant la seduta dals 19 da favrer ha el pudì prender encunter bler laud dal Cdp. Las moderaziuns sajan frestgas, simpaticas e giuvenilas. Che las emissiuns plaschan al public vesan ins er en las raits socialas nua ch'ils commentaris èn ordvart positivs. En quest connex ha il schefredactor da RTR, Flavio Bundi confermà ch'igl è planisà da cuntinuar cun las emissiuns e schizunt d'augmentar il dumber. A partir dal mars datti mintga venderdi saira tranter las 19:00 e las 20:00 in «Olà – da nus para vocês».

Elecziuns dal Cussegl federal senza gronda tensiun

Mintgatant na pon schurnalistas e schurnalists betg influenzar la tensiun dad elecziuns. Uschia er betg ils 11 da december 2019 durant las elecziuns dal Cussegl federal. Malgrà quest fatg ha RTR pudì divertir cun contribuziuns in zic pli spezialas. Menziunads vegnan tranter auter ils pitschens filmins che mussan las stanzas da seduta en chasa federala. Ordvart bain ha er il liveticker sin la pagina d'internet plaschì al Cdp. Grazia a quel sajan ins stà bain infurmà ed i sajan er adina puspè vegnidas integradas bunas infurmaziuns lateralas e contribuziuns da la redacziun d'actualitad. Er il Telesguard dal di d'elecziuns survegn bunas notas dal Cdp. Quel saja stà da buna qualitad, cumpact ed infurmativ.

100 onns circus Knie

Da temp en temp survegn il Cdp da la SRG.R er l'incarica d'observar in'emissiun dad SRF. Quel è numnadamain er represchentà en il Cdp da la SRG Svizra Tudestga (SRG.D). Questa giada è quai stà l'emissiun en duas parts davart il giubileum dal circus Knie. La gruppa rumantscha valitescha l'istorgia da la famiglia Knie sco interessanta, remartgabila ed extraordinaria. L'illustraziun da quest'impurtanta instituziun svizra saja strategjada. Ils commentaris da l'experta per istorgia Eva Schumacher hajan procurà per ina vista

objectiva. Forsa avessan quests commentaris anc pudì esser in zic pli critics, ma tut en tut persuadan els il Cdp da la SRG.R.

In sguard enavant

En la seduta dal matg vegn il Cdp a s'occupar cun las emissiuns da televisiun: *Minisguard e Cuntrasts* e cun l'emissiun da radio *Marella*. Durant plirs mais observan ils commembers da quest gremis las emissiuns e scrivan in rapport en chaussa. En la seduta vegnan lura discutads ils rapports e tut segund fatg propostas per meglieraments.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 058 136 31 30, telefonin 078 722 53 73